



Se sollen jlöve, dat ech ene Duschtyp bön

E Mönke voll Platt

von Johannes Toups

En de Badewann läje, odder onger de Dusche ston jon, dat es hej die Froch! Et soll Mensche jäve, die et janze Lääve onger de Dusche ston jont, ohne dat se sech och blos emol en de Badewann jeleiht hant. Es jöfft ävver och Mensche, die sech emmer jemütlich – bes en et hohe Alder e-ren – blos en de Badewann läje. On dat hät nix domött te don, dat se net mer jout op de Been sind, odder net mer lang ston könne. E-nä, dat Janze es sozusaare en Charakterfroch!

Entweder böse se ene Dusch- odder ene Wannemensch! Böste ene Typ för de Dusche odder vör de Brause, dann böste, wie man et ut dat Woot all e-rut höt, ene Sprenghöppers, ene Wibbelstätz odder ene Brasselsmanes. Es man sonne Typ all als Kenk – so wie däm Düvel ut de Kiep jespronge – dann blivt man dat et janze Lääve lang.

Wie man hüttzedach so säht, de es vital on dynamisch. Deh kann selvs onger de Dusche net stell ston blieve, deh blivt am Höppe, am Liedsches senge, blivt sech mar blos nor de Seep am Böcke, die däm alle zwei Menüdde ut de Häng flutscht. Doröm hät man jo och dat Duschgeel erfonge. Son Plastickfläsch kann man prima överall avstelle. Wegflutsche deht se och nett.

Kött ond jout, Dusche es wat Dynamisches! Man säht jo net ömsöns: Ech jon onger de Dusche ston! Wat so völl bedüft wie „ech donn mech bewäje“. Wellste äver jar nix don, dech bloos ful em Waater läje on dobej e klee bettsche hin on her räkele, dann sähste: „Ech don e Bad nähme!“ Wat sovöll hescht wie, blos kenne Brassel on kenn Bewäjong! Vielleicht blos kött emol mem Fout e beske wärm Waater nor loupe loote! Jemötlich läse kann man och noch en sonn Wann. Man mot blos oppasse, dat et Papier net naat wödd. E läcker Jlaske kann man en de Badewann drenke on dat överall prima avstelle, wat onger de Dusche net jeht. Öm vörr em Bett te frühstücke, jöwt et jo son Tablett vörr övver et Överbett te stelle. Sowatt jövt et och al vör de Badewann. Öm för en de Badewann te brunche, soll et och schon so jät practisches tem Dröverstelle jäve. Et es doch so, en de Badewann nömmt man sech völ Tiet, bade es wat vör Jenießer, die sech emmer völ Tiet nähme, on jenoch dovon hant.

Wenn man eenem fies sin well, kann man natürlich och saare, bade es blos wat vör Schlopmötsche, vör ene Möjdeheini odder ene Trödelspitter. Eijentlich esset jo Pott wie Deckel, wie man dat mäkt. De Hauptsak es doch, man deht et oft jenoch on man rückt net nor Schweed on sonst noch wat on man es net dreckisch. Wenn man mech ens vroche wööt – wenn ech mech zum Beispell vör en nöje Arbeitsstell vürstelle deng, se stelle jö hüttzedach Froore, wo nor man früher nie jefrocht hej – dann don ech dänne net direct op de Naas benge, wie läcker jemütlich et en son Badewann es. Solle se doch blos jlöve, dat ech de dynamische Duschtyp bön! Dat se ene Trödelspitter enjestellt hant, dont se doch noch früh jenoch merke!